

後山居士文集

五

後山居士文集卷第十一

陳師道

無名

表

代謝西川提點刑獄表

惟蜀中之右地乃海內之上游家有刑
書知而不犯地爲沃野富以無求圜
屢空枹鼓幾息久安周召之化寢成齊
魯之風延見吏民間所疾苦諭以寬大
之意使無鞭朴之憂觀其歡欣見于眉

曠無以爲報莫知所言中謝伏念臣賦
命數竒與人寡合以記誦之學起畎畝
之中以刀筆之能供州縣之役居無邑
里之譽孰爲後先之容况茲罪戾之餘
宜在棄捐之數因緣過聽蒙被誤恩備
負理官久出衆人之後奉使詔獄再爲
萬里之行明大義以決疑無儒者之効
奉三尺以從事有俗吏之譏自知甚明
人望何在豈期幸會復與選中用過其

能恩非所望此蓋伏遇 皇帝陛下以
神明之德當制作之時樂與諸臣慎守
成法明揚不次之位期致非常之人顧
臣之愚何以為報謹當竭犬馬之力收
桑榆之功明慎庶刑尉安遠俗以身許
國不知蜀道之難視日近人信有長安
之遠

代賀興龍節表

四序運而歲成爲地之統萬物備而聖

作得天之時敢忘事上之恭竊有增高
之意恭惟 皇帝陛下當天受命繼聖
承家性成堯舜之仁躬行曾閔之孝鑒
觀前載考古義以御今退託未明順下
風而問道方大冬之協律仍千載之膺
期日月清明光氣充塞庶邦有衆願効
忠臣之心萬年無疆請祝聖人之壽臣
莅官有守稱慶不遑永懷盛德之行更
覺長安之遠

代謝賜曆日表

敬授民時永惟王事之本欽崇天道以
協陰陽之和凡爾有邦共承大賜恭惟
太皇太后陛下以神明之德成天地之
能盡萬物同其仁與四時合其信迎日
推筴極天地之至精敘事授方修治朝
之故事臣敢不以時宣政因歲考功庶
寬水旱之憂少逭簡書之責

又

君以民爲心既同其樂人以食爲命必
謹其時爰舉舊章以興嗣歲中謝恭惟
皇帝陛下聰明好學制作順民生資堯
舜之仁躬行曾閔之孝與天同德固無
先後之違繼古成能宜有始終之合臣
謹當布昭寬大勸省事功使無凍餒之
憂庶有消埃之助

代謝夔路提點刑獄表

三巴之險雖天下之畏塗一道之權乃

士倫之高選衆之所慕私以爲憂

中謝

竊以遠之則怨人之常情寵至而憂士
之深慮粗識事君之義豈敢辭難孰聞
長者之言不能無懼然臣忠有餘而智
短心益壯而力殫顧貪寵榮何以稱報
重念臣術學無以應敵容貌不足動人
早以一經誤當公選晚緣再黜幾失明
時雖已往之莫追冀方來之可補此蓋
伏遇 太皇太后陛下用地之道乘天

而行刑賞交修功過並用稍寬罪戾復
在憫憐取其一日之長付以百城之寄
謹當益堅故意以濟暮年志輕萬里之
行身驅九折之險宣昭聖人之化期於
無刑竭輸老馬之能託于不朽

代謝賜恤刑詔表

皇心隱惻念及庶方天語丁寧形於一
札伏讀感歎至于再三中謝伏以克謹
常刑聞之在昔者爲故事方自今朝每

於炎燠之時屢下寬大之詔輝光四燭
囹圄一空人自不寃刑由是措伏惟

皇帝陛下以不忍之心而行不忍之政
當非常之事而有非常之功燕處清閒
不忘三木之被體功施動植尚懼一夫
之向隅誠意所加孰不感動德澤之下
無復過差雖奉累聖之成規實自一時
之至意臣職親訟獄恭奉德音實與吏
民同深慶抃

代賀冊皇后表

爰歷靈辰肇修內職禮成一代風動四方
中謝臣聞朝廷之治本乎家婚姻之
道正乎始爰求茂族用配哲人龜筮協
從人神同福恭惟太皇太后陛下憂
深廟社謀及子孫既成天德之剛復修
陰禮之助本支百世浸被周南之風壽
考萬年膺受天下之養臣職當守土世
受懋恩欣聞大禮之行莫預外庭之賀

代賀正表

行夏之時正得三元之會祝堯之壽願
同萬國之心中賀伏惟 皇帝陛下勇
智自天光文協帝仁而博施盡日月之
照臨聖而不居究古今之治亂徒見成
功之速莫知歲用之微臣祇領郡章親
逢盛旦建四三王之禮更深太史之嗟
舉千萬歲之觴徒切封人之意

代賀西安州表

奉清廟之遺策遠職方之故區因恩賞並
 行人神同慶中謝竊以繼志述事孝之
 大原取亂侮亡古之常道既重譯之來
 享而小醜之弗賓金鼓一鳴河山四裂
 斷匈奴之臂告成太平之功藏郅支之
 頭永為夷狄之戒伏惟 皇帝陛下勤
 於堯禹英類 祖宗仁政而有勇功文
 德以立武事表西郊之道示無萬里之
 行舉外廷之觴更上億年之壽

代賀生皇子表

甲館告寧天爲百瑞恩言周布歡動四方
中賀臣聞聖則多男人之所祝冠而
生子古以爲祥恭惟昌期宜有昭報上
以慰兩宮之念下以爲萬世之基凡在
寰區舉興善頌伏惟 皇帝陛下聖神
文武眷哲溫恭以天縱生知之資務日
就默識之學內修法度煥然一代之文
外服戎夷終自兩階之舞承列聖之不

緒方懷燕翼之思以百姓而爲心宜有
子孫之福益著思齊之聖更形旣醉之
詩十四月而生堯已有同德之兆千萬
歲而壽武願同庶物之心

又

吉月令辰是生元嗣榮光休氣昭示聖
期天地合符華夷交慶中賀臣聞王者
之孝以繼體爲先人子子之心以順親爲
樂惟時盛旦顯有休符幼徇成明將主

七廟之器抱孫弄稚祗奉兩宮之歡伏
惟 皇帝陛下以人爲心視民猶子三
刑設而未用五兵儲而不陳鳥獸蟲魚
咸得其所山川神鬼亦莫不寧故得萬
物之歡心而獲百順之顯福國勢定而
加重人心安而益舒四海同聲豈特封
人之祝三靈効祉不待高禩之求建昭
代之盛儀弗從故事第從臣之嘉頌莫
効微材

代賀冊皇后表

龜筮協從古今同貫盛儀既舉休氣來

臨臣

中賀

竊以三后興邦必有同心之

助六朝成憲著聞積德之外惟關睢左

右之求有思齊十百之報人有所仰邦

其永昌恭惟

皇帝陛下既聖不居持

成如始攷圖數貢盡雨露之所濡緯地

經天宜陰陽之備位爰因誕聖遂正洪

名德配二宗竝有照臨之意功施四海